

151. löggjafarþing 2020–2021.

Þingskjal x — x. mál.

Stjórnarfrumvarp.

Frumvarp til laga

um stafrænt pósthólf í miðlægri þjónustugátt stjórnvalda

Frá fjármála- og efnahagsráðherra.

1. gr.

Markmið.

Markmið laga þessara er að stuðla að skilvirkri opinberri þjónustu, auka gagnsæi við meðferð mála og hagkvæmni í stjórnsýslu og tryggja örugga leið til miðlunar gagna við einstaklinga og lögaðila. Jafnframt er það markmið laganna að megin boðleið stjórnvalda við einstaklinga og lögaðila verði stafræn og miðlæg á einum stað.

2. gr.

Pósthólf.

Starfrækja skal stafrænt pósthólf í miðlægri þjónustugátt stjórnvalda í samræmi við ákvæði laga þessara.

Ráðherra ber ábyrgð á að starfrækt sé stafrænt pósthólf. Heimilt er að ákveða með reglugerð að fela öðrum ríkisaðila að annast rekstur þess.

Allir einstaklingar sem fá útgefna kennitölu samkvæmt lögum um skráningu einstaklinga og allir lögaðilar sem skráðir eru í fyrirtækjaskrá á hverjum tíma samkvæmt lögum um fyrirtækjaskrá, hafa aðgang að sínu eigin stafræna pósthólfi.

3. gr.

Aðgangur að pósthólfi.

Einstaklingur og fulltrúi lögaðila hefur aðgang að eigin pósthólfi í miðlægri þjónustugátt með rafrænni auðkenningu sem metin er fullnægjandi til sannvottunar samkvæmt lögum um rafræna auðkenningu og traustsþjónustu fyrir rafræn viðskipti.

Einstaklingur og fulltrúi lögaðilans, sem hefur aðgang að pósthólfi í miðlægri þjónustugátt skv. 1. mgr., getur veitt öðrum aðila aðgang að gögnum sem pósthólfið inniheldur.

Forsjáraðilar barna skulu hafa aðgang að gögnum í pósthólfi þeirra fram til þess að þau ná 18 ára aldri nema annað leiði af sérákvæðum í lögum.

Aðili, sem falið er á grundvelli laga að gæta hagsmuna einstaklings eða lögaðila, skal hafa aðgang að pósthólfi viðkomandi.

4. gr.

Birting gagna.

Í stafrænu pósthólfi skal birta hvers konar gögn, jafnt rituð sem í öðru formi, sem verða til við meðferð máls, svo sem tilkynningar, ákvarðanir, úrskurði, ákvaðir og aðrar yfirlýsingar.

Birtingaraðili ber ábyrgð á þeim gögnum sem hann birtir í pósthólfi viðtakanda.

Rekstraraðili pósthólfs skal gera birtingaraðila viðvart, verði töf á birtingu gagna.

5. gr.

Afhending gagna með öðrum hætti.

Óski einstaklingur eða lögaðili eftir því við birtingaraðila að fá gögn með öðrum hætti er birtingaraðila heimilt að innheimta gjald vegna slíkrar þjónustu til að standa undir þeim viðbótarkostnaði sem hlýst af umbreytingu og afhendingu gagnanna. Gjald skal miðast við kostnað við að veita þjónustuna og skal það standa straum af launakostnaði, sérstökum efniskostnaði sem þjónustunni tengist og öðrum umsýslukostnaði.

6. gr.

Birtingaraðilar.

Opinberum aðilum, þ.e. ríki, sveitarfélögum, stofnunum þeirra og öðrum opinberum aðilum, er skylt að birta gögn í pósthólfinu.

Ráðherra skal með reglugerð ákveða hvaða öðrum aðilum er heimilt að birta gögn í pósthólfinu og hvaða skilyrði þeir þurfi að uppfylla.

7. gr.

Réttaráhrif.

Þegar gögn eru aðgengileg í pósthólfi teljast þau birt fyrir viðtakanda. Þar sem í lögum eða stjórnvaldsreglum er kveðið á um að gögn skulu birt með ákveðnum hætti, svo sem með auglýsingu, símskeyti, ábyrgðarbréfi, stefnuvotti eða öðrum sannanlegum hætti, skal birting í stafrænu pósthólfi metin fullgild.

8. gr.

Meðferð persónuupplýsinga.

Meðferð og vinnsla persónuupplýsinga sem fylgir starfrækslu pósthólfsins skal hverju sinni uppfylla skilyrði laga um persónuvernd og vinnslu persónuupplýsinga.

Kröfum um aðgang að upplýsingum á grundvelli annarra laga eða samkvæmt dómi skal beint til viðkomandi birtingaraðila.

9. gr.

Reglugerðarheimild.

Ráðherra er heimilt að setja í reglugerð nánari ákvæði um framkvæmd laga þessara, þar á meðal um:

- a. Rekstur og ut anumhald á pósthólfinu, sbr. 2. mgr. 2. gr.
- b. Nánari útfærslu á aðgangi að pósthólfinu, sbr. 3. gr.
- c. Skilyrði og takmarkanir fyrir afhendingu gagna með öðrum hætti, sbr. 4. gr.
- d. Öðrum aðilum en opinberum sem heimilt er að birta gögn í pósthólfinu, sbr. 2. mgr. 6. gr.
- e. Nánari skilyrði um meðferð og vinnslu persónuupplýsinga, sbr. 8. gr.

10. gr.

Gildistaka.

Lög þessi öðlast þegar gildi sbr. þó 2. mgr.

Ráðherra skal eigi síðar en fyrir lok árs 2021 gefa út verkefnisáætlun um innleiðingu stafrænna birtinga af hálfu ríkisaðila og sveitarfélaga, sem miðar við að framangreindir aðilar geti boðið upp á stafrænar birtingar eigi síðar en 1. janúar 2025. Listi yfir birtingaraðila og

hvaða gögn eru birt af þeirra hálfu skal vera birtur í miðlægu þjónustugáttinni þar til innleiðingu er lokið.

Greinargerð.

1. Inngangur.

Frumvarp þetta er samið í fjármála- og efnahagsráðuneytinu í samvinnu við dómsmálaráðuneytið.

Í stefnufirlýsingu ríkisstjórnarinnar frá 30. nóvember 2017 kemur fram að byggja skuli upp stafræna þjónustugátt þar sem landsmenn geti á einum stað nálgast þjónustu hins opinbera og sinnt þeim erindum sem beinast að stjórnvöldum og er Ísland.is nú þegar vísir að slíkri gátt. Á fundi ríkisstjórnar í maí 2018 var staðfest sú stefna að árið 2020 skuli stafræn þjónusta verða megin leið samskipta á milli hins opinbera (ríkis og sveitarfélaga), almennings og fyrirtækja. Þá segir í þingsályktun nr. 22/150 frá 29. janúar 2020 að fjármála- og efnahagsráðherra skuli stórefla vinnu er varðar gæði rafrænnar þjónustu hins opinbera gagnvart almenningi.

Frumvarp þetta er í samræmi við framangreinda stefnufirlýsingu og heimilar það stjórnvöldum að senda gögn til einstaklinga og lögaðila með stafrænum hætti í meiri mæli en nú er gert.

2. Tilfni og nauðsyn lagasetningar.

Samfélagið hefur tekið miklum breytingum undanfarna áratugi. Tækniþróun í fjarskipta- og upplýsingatækni hefur verið afar hröð og gert einstaklingum kleift að sækja sér upplýsingar og þjónustu hvar og hvenær sem er. Þá hefur tilkoma og útbreidd notkun rafrænna skilríkja m.a. leitt til þeirra breytinga að fólk þarf síður að mæta í eigin persónu til að sækja sér gögn og þjónustu hjá stofnunum og fyrirtækjum.

Miðlæga þjónustugáttin á Ísland.is er grundvöllur þess að ná markmiði fyrrgreindrar stefnufirlýsingar um að opinber þjónusta verði að mestu leyti með stafrænum hætti. Mikilvægt skref í þeirri vegferð er að tryggja stofnunum fullnægjandi lagaheimild til að geta sent einstaklingum og lögaðilum gögn með stafrænum hætti, þannig að birtingin hafi sömu réttaráhrif og þegar gögn eru send með öðrum hætti. Tugir stofnana nota nú þegar pósthólfið á Ísland.is til að senda gögn til einstaklinga og lögaðila, án þess þó að sett hafi verið sérstök lög eða reglur um hina miðlægu þjónustugátt eða þau gögn sem berast í gegnum stafrænt pósthólf í gáttinni. Æskilegt er að eyða öllum vafa um réttaráhrif birtingar í pósthólfinu og er frumvarpinu ætlað að gera það.

Með því að setja sérstök lög um pósthólfið er tryggt að réttaráhrif þess að gera gögn aðgengileg í pósthólfinu verði þau sömu og þegar gögn berast með bréfpósti eða öðrum hætti. Þegar gögn hafa verið gerð aðgengileg í pósthólfi viðtakanda teljast þau þar með birt viðtakanda sjálfum. Frumvarpið tekur til allra gagna, þ.m.t. tilkynninga, ákvarðana og ákvaða sem viðtakandi er bundinn af, með tilliti til kærufrests og efni gagnanna að öðru leyti.

Markmið lagasetningarinnar er að auka gagnsæi, réttaröryggi og hagræði á mörgum sviðum samfélagsins, auk þess að styðja við frekari framþróun á stafrænni þjónustu fyrir almenning.

3. Meginefni frumvarpsins.

Með frumvarpinu er lagt til að starfrækja skuli stafrænt pósthólf í miðlægri þjónustugátt stjórnvalda til hagsbóta fyrir almenning. Í frumvarpinu er gerð grein fyrir markmiðum þessarar samskiptaleiðar, sem fram til þessa hefur verið starfrækt án sérstaks lagagrundvallar. Meginmarkmið frumvarpsins eru að stuðla að skilvirkri opinberri þjónustu, auka gagnsæi og hagkvæmni við meðferð mála og tryggja örugga leið til samskipta stjórnvalda við einstaklinga og lögaðila á einum stað.

Með frumvarpinu er gert ráð fyrir þeirri meginreglu að stjórnvöld sendi gögn til einstaklinga og lögaðila með stafrænum hætti. Lagt er til að einstaklingar sem hafa fengið útgefna kennitölu samkvæmt lögum um skráningu einstaklinga og lögaðilar sem skráðir eru með kennitölu í fyrirtækjaskrá eigi hver sitt pósthólf sem að jafnaði þeir einir hafa aðgang að. Sú aðferð að senda gögn á vegum hins opinbera með rafrænum hætti í pósthólfið mun hafa sömu réttaráhrif og þegar gögn berast með bréfpósti eða öðrum hætti. Í innleiðingaráætlun verður nánar útfært hvernig staðið verður að því að færa stafræn samskipti yfir í pósthólfið en miðað er við að það gerist í fleiri áföngum. Eftir tiltekinn tíma munu öll gögn frá ríkisaðilum verða send í pósthólf einstaklinga og lögaðila og munu einstaklingar og lögaðilar bera ábyrgð á því að kynna sér þau gögn sem berast í þeirra pósthólf rétt eins og þeir þurfa í dag að kynna sér upplýsingar sem berast sem dæmi með pósti eða stefnuvotti. Kjósi einstaklingur að fá gögn með öðrum hætti er gert ráð fyrir að birtingaraðila sé heimilt að innheimta gjald vegna þeirrar þjónustu.

Í dag er miðlæga þjónustugáttin þekkt sem Ísland.is og með rafrænni auðkenningu getur hver og einn tengst sínu eigin stafræna pósthólfi í gáttinni. Til að auðvelda einstaklingum að fylgjast með nýjum gögnum má stilla gáttina þannig að hnippi sé í viðtakanda ef ný gögn berast. Í dag er hnippið útfært þannig að viðkomandi fær sendan tölvupóst en unnt er að fara fleiri leiðir í þeim efnum, t.d. með skilaboðum í farsíma.

Heimild er í stjórnsýslulögum fyrir rafrænni málsmeðferð og birtingu stjórnvaldsákvarðana með rafrænum hætti. Fram til þessa hafa þó netföng ekki verið tengd viðtakanda með nægilega tryggum hætti, auk þess sem viðtakendur geta misst aðgang að netfangi sínu. Þá hefur birting gagna með tölvupósti ekki verið talin örugg leið fyrir miðlun sumra gagna, sérstaklega þegar um viðkvæmar persónuupplýsingar er að ræða. Úr þessu er bætt með stafrænu pósthólfi einstaklinga í umræddri miðlægri þjónustugátt stjórnvalda. Eins og fyrr greinir er um að ræða heimildarákvæði í stjórnsýslulögum fyrir rafrænni málsmeðferð og því eru stjórnvöld ekki skyldug til að fara þá leið við meðferð stjórnsýslumála. Sú leið sem hér er lögð til felur því í sér réttarbót fyrir almenning með því að mæla fyrir um skyldu stjórnvalda til þess að birta gögn með stafrænum hætti. Með því er horft til réttaröryggissjónarmiða þar sem almenningur getur gengið að því vísu að gögn frá þeim stjórnvöldum sem eru skyldug til stafrænna birtinga rati á persónulegt svæði viðtakanda.

Frumvarpið gerir ráð fyrir vinnslu persónuupplýsinga, þar á meðal vinnslu ákveðinna viðkvæmra persónuupplýsinga, í þágu þeirra verkefna sem frumvarpið mælir fyrir um. Vinnsla upplýsinga í öðrum og ósamrýmanlegum tilgangi er óheimil. Áhersla verður lögð á að tryggja öryggi, áreiðanleika og varðveislu upplýsinga og er miðað við að heimildarákvæðunum verði beitt með varfærnum hætti og í samræmi við ákvæði viðeigandi laga og reglna, þ. á m. um persónuvernd og vinnslu persónuupplýsinga. Þá verða gerðir vinnslusamningar við hlutaðeigandi stofnanir sem teljast birtingaraðilar og ábyrgðaraðilar gagnanna. Birtingaraðilar bera sjálfir ábyrgð á þeim gögnum sem gerð eru aðgengileg í pósthólfi viðtakanda. Þrátt fyrir nýtt birtingarform þá fer ábyrgð á vörslu og meðferð gagna áfram samkvæmt ákvæðum annarra laga. Mun vinnsla persónuupplýsinga hjá þeim stofnunum fara fram í málefnalegum tilgangi og að uppfylltum skilyrðum þeirra laga. Pósthólfið mun

hverju sinni uppfylla kröfur um fullnægjandi öryggisráðstafanir þannig að tryggt verði að ekki sé hægt að breyta eða eyða gögnum ólöglega sem birt hafa verið í pósthólfinu.

Við gerð þessa frumvarps var framkvæmdin á Norðurlöndum höfð til hliðsjónar. Í Finnlandi, Noregi og Svíþjóð er framkvæmdin sú að ríkisstofnunum (og sveitarfélögum að vissu marki) er skylt að bjóða upp á gagnasendingar í stafrænt pósthólf einstaklinga og lögaðila, en þeim aðilum er hins vegar ekki skylt að vera með stafrænt pósthólf. Hefur sú útfærsla leitt til þess að notkun þessa úrræðis er tiltölulega lítið útbreidd í þeim löndum. Þessu er öfugt farið í Danmörku en þar er opinberum aðilum skylt að senda gögn í stafrænt pósthólf og einstaklingum og lögaðilum er skylt að hafa stafrænt pósthólf. Bera einstaklingar og lögaðilar ábyrgð á að kynna sér þau gögn sem berast í pósthólfið og bregðast við þeim gögnum eftir aðstæðum. Byggir frumvarp þetta á sambærilegri útfærslu og í Danmörku.

4. Samræmi við stjórnarskrá og alþjóðlegar skuldbindingar.

Efni frumvarpsins gefur ekki tilefni til að ætla að tillögur þess stangist á við stjórnarskrá eða alþjóðlegar skuldbindingar. Aðgangi að pósthólfinu er stýrt með rafrænni auðkenningu sem metin er fullnægjandi til sannvottunar. Fullnægjandi sannvottun er sú auðkenningarleið sem er í samræmi við reglugerð Evrópuþingsins og ráðsins (ESB) nr. 910/2014 sem tryggir hátt fullvissustig auðkenningar, sbr. lög nr. 55/2019 um rafræna auðkenningu og traustþjónustu.

5. Samráð.

Frumvarpið snertir almenning allan, fyrirtæki og opinbera aðila. Þá varðar frumvarpið málefni annarra ráðuneyta þar sem það leggur grundvöll að samskiptaleið sem stjórnvöldum er ætlað að nýta til að upplýsa, tilkynna og birta fyrir almenningi hvers kyns gögn. Samráð fór fram innan starfshóps um tækniháð lög, þar sem sitja sérfræðingar frá öllum ráðuneytum. Auk þess voru áformaskjöl um lagasetningu kynnt í samráðsgátt stjórnvalda. Alls bárust ellefu umsagnir sem voru hafðar til hliðsjónar við samningu frumvarpsins.

6. Mat á áhrifum.

Verði frumvarpið samþykkt kemur það til með að hafa áhrif á almenning allan. Þessi samskiptaleið mun tryggja betra aðgengi að gögnum frá ríkisstofnunum þar sem unnt verður að nálgast gögn í pósthólfi hvenær og hvar sem er.

Gögn frá ríkisstofnunum verða birt án óþarfa tafa fyrir þá sem koma að máli og því heyrir það sögunni til að bíða að lágmarki í nokkra virka daga eftir að umslag berist inn um bréfalúgu. Þá er póstur sem berst inn um bréfalúgu gjarnan meðhöndlaður af nokkrum einstaklingum áður en hann skilar sér á lögheimili viðkomandi og því ekki fyllilega örugg meðferð gagna. Með því að senda gögn með stafrænum hætti verður hægt að tryggja að gögnin verði ekki aðgengileg óviðkomandi einstaklingum, enda eru þau send beint í pósthólf viðkomandi aðila sem er á aðgangsstýrðu svæði. Öryggi sendinga mun því aukast til muna.

Áhrif lagasetningarinnar á stjórnsýslu ríkisins verða töluverð þar sem sendingar gagna verða skilvirkari og með öruggeri hætti en áður, enda verður pósthólf viðkomandi einstaklings eða lögaðila tengd við kennitölur en ekki heimilisfang. Af þeirri ástæðu mun það heyra sögunni til að heimilisfang einstaklinga standi í vegi fyrir því að gögn verði birt réttum viðtakanda á sem skemmstum tíma. Þar af leiðandi mun umsýsla póstsendinga vera töluvert einfaldari.

Það að skylda opinbera aðila til að birta gögn með stafrænum hætti mun ótvírætt leiða til verulegs sparnaðar fyrir ríkissjóð til lengri tíma. Kostnaður við pósturðargjöld ríkisins eru í

dag um 439 milljónir á ári. Sparnaður við póstsendingar er aðeins hluti af þeim jákvæðu áhrifum sem verða fyrir ríkissjóð því auk póstburðargjalda verður sparnaður við umsýslu starfsmanna, prentun og fleira. Má því ætla að breytt fyrirkomulag við birtingar hafi í för með sér hagræðingu fyrir ríkissjóð á bilinu 300 til 700 milljónir á hverju ári. Ljóst er að umtalsverð hagræðing verður einnig hjá sveitarfélögum. Þá mun frumvarpið jafnframt hafa jákvæð áhrif á umferð, kolefnislosun og tímanotkun almennings. Minni pappírsmarkaður minnkar magn pappírs í úrgangsbjónustu sem og afleiddan húsnæðiskostnað vegna pappírsskjalavistunar og tryggir einnig betri rekjanleika í upplýsingagjöf. Þrátt fyrir að ætla megi að í upphafi komi til aukins kostnaðar og aukinnar vinnu hjá stofnunum, sértaklega á innleiðingartímabili, þá er ljóst að til lengri tíma verður töluverð hagræðing fyrir samfélagið allt.

Samfélagið hefur tekið miklum breytingum undanfarna áratugi og þá sérstaklega síðustu mánuði og ár. Tækniþróun í fjarskipta- og upplýsingatækni hefur verið afar hröð og gert einstaklingum kleift að sækja sér upplýsingar og þjónustu hvar og hvenær sem er. Þá hefur tilkoma rafrænna skilríkja m.a. leitt til þeirra breytinga að fólk þarf síður að mæta í eigin persónu til stofnana og lögaðila eftir þjónustu. Samfélagslegur ávinningur fylgir því lagabreytingunni vegna hagræðis fyrir einstaklinga þar sem þeir munu geta nálgast gögn sín hvar og hvenær sem er. Mun breytt fyrirkomulag við birtingar því vera til mikilla hagsbóta, jafnt fyrir almenning og hið opinbera.

Um einstakar greinar frumvarpsins.

Um 1. gr.

Markmið frumvarpsins er tilgreint í 1. gr. en það er að stuðla að skilvirkri opinberri þjónustu, auka gagnsæi við meðferð stjórnsýslumála og hagkvæmni í stjórnsýslu og tryggja örugga samskiptaleið á einum stað. Með frumvarpinu er að því stefnt að megin samskiptaleið stjórnvalda við einstaklinga og lögaðila verði stafræn.

Um 2. gr.

Í 1. mgr. er mælt fyrir almennri heimild til að stafrækja pósthólf í miðlægri þjónustugátt á vegum stjórnvalda. Með ákvæðinu er kveðið á um lagalega stoð fyrir þeirri þjónustugátt sem nú þegar er til staðar á vegum stjórnvalda og undirbyggir ákvæðið áframhaldandi rekstur og þróun gáttarinnar.

Í 2. mgr. er ráðherra veitt heimild til að ákveða með reglugerð að fela öðrum ríkisaðila rekstur og almenna umsýslu pósthólfsins. Ábyrgðin á starfrækslu pósthólfsins verður áfram í höndum ráðherra sem fer með yfirstjórn málefnsins hverju sinni.

Í samræmi við markmið frumvarpsins um að megin samskipti stjórnvalda við almenning verði með stafrænum hætti fá allir sem hafa fengið útgefna kennitölu úthlutað aðgangi að eigin pósthólfi. Í 3. mgr. er því gert ráð fyrir að allir þeir einstaklingar sem hafa fengið útgefna kennitölu eigi sitt eigið stafræna pósthólf, hvort sem um er að ræða kennitölur og kerfiskennitölur. Þá er einnig gert ráð fyrir að allir lögaðilar sem skráðir eru í fyrirtækjaskrá á hverjum tíma skv. 1.-4. tl. 2. gr. laga um fyrirtækjaskrá, nr. 17/2003, eigi sitt eigið stafræna pósthólf.

Um 3. gr.

Samkvæmt 1. mgr. hafa allir einstaklingar og fulltrúar lögaðila, sem geta auðkennt sig rafrænt, aðgang að pósthólfi skv. 2. gr. frumvarpsins. Með fulltrúum lögaðila er fyrst og fremst átt við æðstu stjórnendur, framkvæmdastjóra og prókúruhafa. Aðgangi að pósthólfinu er stýrt með rafrænni auðkenningu sem metin er fullnægjandi til sannvottunar. Fullnægjandi sannvottun er sú auðkenningarleið sem er í samræmi við reglugerð Evrópuþingsins og ráðsins (ESB) nr. 910/2014 sem tryggir hátt fullvissustig auðkenningar, sbr. lög nr. 55/2019 um rafræna auðkenningu og traustþjónustu.

Samkvæmt 2. mgr. getur einstaklingur og fulltrúi lögaðila veitt öðrum einstaklingi aðgang að gögnum í pósthólfi sínu. Sá sem fær aðgang þarf rétt eins og aðilinn sjálfur að auðkenna sig rafrænt við innskráningu inn í pósthólfið. Það gæti nýst við ýmis tilefni, svo sem fyrir einstaklinga sem geta ekki gætt hagsmuna sinna og þurfa aðstoð við það, t.d. vegna fötlunar, veikinda, öldrunar eða annarra ástæðna. Sem dæmi um lögaðila má nefna tilvik þegar þörf er á aðgangi fyrir fleiri en einn starfsmann fyrirtækisins og fyrir endurskoðendur fyrirtækja.

Í 3. mgr. segir að forsjáaraðilar barna skulu hafa aðgang að pósthólfi þeirra. Það hver telst forsjáaraðili barns fer eftir skráningu í þjóðskrá og lögum að öðru leyti. Mæli sérlög fyrir um takmarkanir á aðgangi forsjáaraðila þá ganga slík ákvæði framur 3. mgr. 3. gr. Sem dæmi má nefna 25. gr. laga um réttindi sjúklunga nr. 74/1997.

Í 4. mgr. segir að aðila, sem falið er á grundvelli laga að gæta hagsmuna einstaklings eða lögaðila, skuli veittur aðgangur að pósthólfi viðkomandi. Sem dæmi hvað varðar einstakling má nefna yfirlögráðanda eða skipaðan lögráðamann einstaklings sem hefur verið sviptur fjárræði og/eða sjálfræði. Við þær aðstæður takmarkast aðgangurinn við þann tíma meðan svipting varir. Sem dæmi hvað varðar lögaðila má nefna fyrirsvarsmann dánarbús og skiptastjóra við gjaldþrotaskipti.

Um 4. gr.

Í 1. mgr. eru talin upp í dæmaskyni helstu gögnin sem lögin taka til og er því ekki um tæmandi talningu að ræða. Gögnin geta því verið af öðrum meiði og/eða með önnur réttaráhrif en ákvæðið lýsir. Með því er tryggt að heimilt sé að birta hvers konar gögn á vegum opinberra aðila með stafrænum hætti, hvort sem þau stafa frá ríkisstofnunum eða sveitarfélögum. Þegar fram í sækir er stefnt að því að fleiri aðilar geti nýtt pósthólfið til birtingar, þ. á m. lögmenn í tengslum við mál sem falla undir réttarfarslög sem og aðrir einkaaðilar sem birta ýmsar tilkynningar sem byggja á lögum eða stjórnvaldsfyrirmælum.

Í 2. mgr. er áréttað að birtingaraðili beri sjálfur ábyrgð á þeim gögnum sem hann gerir aðgengileg í pósthólfi viðtakanda. Þrátt fyrir nýtt birtingarform þá fer ábyrgð á vörslu og meðferð gagna áfram samkvæmt ákvæðum annarra laga.

Með 3. mgr. er lögð sú skylda á herðar rekstraraðila pósthólfsins að gera birtingaraðila viðvart ef upp koma breistir eða tafir á birtingu.

Um 5. gr.

Allir einstaklingar og lögaðilar eiga sitt eigið stafrænt pósthólf. Með því verður unnt að tryggja að megin samskiptaleið ríkisins verði með stafrænum hætti. Viðkomandi getur kosið að fá gögnin send með öðrum hætti, til dæmis á pappír, en þá er birtingaraðila heimilt að innheimta gjald vegna þeirrar þjónustu. Kostnaðurinn sem hlýst af þjónustunni skal ekki vera umfram þann viðbótarkostnað sem hlýst af umbreytingu og afhendingu gagnanna og skal fjárhæð gjaldsins miðast við almennan kostnað við að veita þjónustuna, svo sem stofn- og rekstrarkostnað eða í samræmi við gjaldskrá utanaðkomandi þjónustuaðila.

Um 6. gr.

Samkvæmt 1. mgr. er opinberum aðilum skylt að birta gögn í pósthólfinu. Með opinberum aðilum er átt við ríkisaðila og sveitarfélög. Skilgreining ríkisaðila er í samræmi við 13. tölul. 3. gr. laga um opinber fjármál nr. 123/2015.

Samkvæmt 2. mgr. hefur ráðherra heimild til að veita öðrum aðilum aðgang að stafrænum birtingum og mæla fyrir um skilyrði sem þeir þurfa að uppfylla til að geta birt gögn í pósthólfinu. Sem dæmi má nefna lögmenn í tengslum við mál sem falla undir réttarfarslög sem og aðrir einkaaðilar sem birta ýmsar tilkynningar sem byggja á lögum eða stjórnsvaldsfyrirmælum.

Um 7. gr.

Samkvæmt 1. mgr. teljast gögn hafa verið birt fyrir viðtakanda sjálfum þegar gögnin hafa verið gerð aðgengileg í pósthólfi viðtakanda. Gögn pósthólfsins teljast hafa verið gerð aðgengileg í pósthólfi viðtakanda um leið og viðtakandi getur framkallað skilaboðin í gagnatengdu snjalltæki og haft þannig aðgang að gögnunum. Ekki er nauðsynlegt að viðkomandi hafi skráð sig inn í pósthólfið og kynnt sér gögnin, heldur teljast gögnin birt frá og með því tímamarki sem þau voru gerð aðgengileg í pósthólfinu og viðkomandi hefði þar með getað kynnt sér gögnin.

Samkvæmt 2. mgr. telst birting í pósthólfinu jafngild birtingu með auglýsingu, símskeyti, ábyrgðarbréfi, stefnuvotti eða með öðrum sannanlegum hætti. Talning þessi er ekki tæmandi og því er stafræn birting jafnframt heimiluð þegar réttarreglur mæla fyrir um aðra birtingaraðferð. Með ákvæðinu er lögð áhersla á að stafræn birting gagna sé metin fullgild þrátt fyrir að ákvæði sérlaga tiltaki það ekki sérstaklega. Þannig þurfi lögin að skoðast samhliða sérlögum þegar kemur að mati á gildri birtingu.

Þeir einstaklingar og lögaðilar sem fá gögn send í sitt pósthólf bera ábyrgð á því að kynna sér gögnin og geta því ekki byggt á grandleysi um efni þeirra við meðferð mála. Með því er hvorki lögð meiri né minni ábyrgð á herðar móttakanda gagnanna en nógildandi réttarreglur gera til einstaklinga um að fylgjast með þeim gögnum sem berast með hefðbundnum hætti og bregðast við þeim á viðeigandi hátt.

Um 8. gr.

Í 1. mgr. er áréttað mikilvægi þess að skilyrðum laga um persónuvernd og vinnslu persónuupplýsinga sé fylgt í hvívetna við meðferð persónuupplýsinga sem birtast í stafrænu pósthólfi einstaklinga. Rekstraraðila er heimilt að vinna með persónuupplýsingar, svo lengi sem vinnslan fari saman við lögmælt hlutverk hans samkvæmt frumvarpi þessu. Við vinnsluna þarf að gæta meðalhófs og hún þarf að vera í samræmi við tilgang þann sem kveðið er á um í greininni. Ekki er heimilt að vinna upplýsingarnar í öðrum og ósamrýmanlegum tilgangi.

Með 2. mgr. er lögð áhersla á að tryggja skuli fyllsta öryggis við sendingu og meðferð upplýsinga. Þá þurfi að auki að gera aðrar öryggisráðstafanir til samræmis við lög um persónuvernd og vinnslu persónuupplýsinga og reglur sem settar hafa verið á grundvelli þeirra.

Um 9. gr.

Með ákvæðinu er lagt til að ráðherra verði heimilt að setja reglugerð um nánari framkvæmd frumvarpsins, enda gera mörg ákvæði frumvarpsins ráð fyrir að framkvæmdin verði útfærð nánar í reglugerð. Ákvæðið þarfnast ekki frekari skýringa.

Um 10. gr.

Ákvæði 1. mgr. þarfnast ekki sérstakra skýringa.

Í 2. mgr. er gert ráð fyrir aðlögunartíma fyrir birtingaraðila. Þó svo að tæknilegar forsendur séu fyrir hendi og unnið sé að tengingu stofnana við stafræna pósthólfið sér ekki fyrir endann á því verkefni. Við samningu innleiðingaráætlana mun ráðherra þurfa að hafa samráð við þá aðila sem málið snertir í ljósi þess að aðilar eru í misgóðri aðstöðu með tækniinnviði. Því þarf að aðlaga margs konar hugbúnað til að geta sent gögn stafrænt, rétt eins og þetta ferli mun fela í sér ýmsar breytingar á verkferlum og verklagsreglum fyrir starfsmenn viðkomandi aðila. Gert er ráð fyrir að sú áætlun liggi fyrir ekki síðar en í lok árs 2021 og að hún miði við að allir opinberir aðilar bjóði upp á stafrænar birtingar eigi síðar en 1. janúar 2025. Þar til innleiðingu lýkur mun ráðherra birta lista yfir birtingaraðila og hvaða gögn verða birt af þeirra hálfu í miðlægu þjónustugáttinni. Verður það gert til þess að auðvelda innleiðingarferlið og auka yfirsýn fyrir einstaklinga og lögaðila.